

說
鄒

正
三

6
5



412特
6
5



說郛目錄

弓第三

周易舉正 郭京

讀易私言 許衡

元包數義 張行成

續書記 劉因

論語筆解 韓愈

論語拾遺 蘇轍

疑孟 司馬光



說郛目錄
弓第三

詰墨

孔鮒

翼莊

郭象

周易舉正

唐 郭京



乾九三君子終日乾乾夕惕若厲无咎註純修下道
 則處下之禮曠終日乾乾至于夕猶惕若厲也謹按
 定本猶字在惕字上則夕字為絕句今則惕字在猶
 字上則惕字為絕句則下若字宜訓為如夕字為絕
 句則若字宜為語辭
 坤初六履霜堅冰至象曰履霜陰始凝也謹按陰始
 凝也上誤增堅冰字

周易舉正

一

屯六三象曰卽鹿无虞何以從禽也脫何字

師六五田有禽利執之无咎謹按定本之字行書向下引脚稍類行書言字轉寫相仍遂成謬誤

比彖曰比吉吉字下誤增也字

九五象曰顯比之吉位正中也失前禽舍逆取順也今本舍逆取順一句誤在失前禽上

泰六四象曰翩翩不富皆反實也反誤作失字

隨彖曰隨大亨利貞无咎而天下隨時謹按彖大亨下脫利字

賁不利有攸往彖故不利有攸往謹按定本不字草書勢如小字

剛柔交錯天文也文明以止人文也天文上脫剛柔交錯一句

剝彖曰剝剝落也按今本脫落字

无妄彖曰无妄剛自外來而爲主於內動而愈健謹按經脫愈字

象曰天下雷行物與无妄先王以茂對時育物物上誤增萬字

六二謹按象曰不耕而獲求富也求字誤作未字

大畜上九象何天之衢亨道大行也脫亨字

坎習坎彖曰坎習坎重陷也謹按卦首習字上脫卦名坎字彖曰下亦脫坎字

離象曰明兩作離大人以明照繼明照于四方謹按脫明照字

大壯六五喪牛于易象曰喪牛于易牛字並誤寫羊字

明夷上六至晦謹按晦字上脫至字誤增不明字

蹇象曰山上有水蹇君子以正身修德謹按經註正字並誤作反字

九三往蹇來正象曰往蹇來正謹按經註象三正字並誤作反字

姤女壯勿用取女彖曰姤遇也柔遇剛也女壯勿用取女不可與長也謹按繇辭取字下誤增女字彖辭

勿用取上脫女壯字勿用取下誤增女字
萃彖曰萃聚也順以說剛中而應故聚也王假有廟

致孝亨也利見大人亨利貞聚以正也謹按彖舉繇

辭脫利貞字

困初六象曰入于幽谷不明也不明字上誤增幽字
井彖曰巽乎水而上水井井養而不窮也改邑不改
井无喪无得往來井井乃以剛中也謹按脫无喪无
得往來井井兩句

鼎元吉亨彖曰鼎象也以木巽火亨飪也聖人亨以
亨上帝以養聖賢謹按經帝字下誤增而大亨字
震彖曰震亨震來虩虩恐致福也笑語啞啞後有則
也震驚百里驚遠而懼邇也不喪匕鬯出可以守宗

廟社稷以爲祭主也謹按經脫不喪匕鬯字

艮九三艮其限謹按限字誤作身字

漸彖女歸吉也謹按漸彖女歸吉下誤增也字

象君子以居賢德善風俗謹按脫風字

歸妹六五小象不知其娣之袂良謹按良字下誤增
也字

豐九四象曰遇其夷主吉志行也謹按脫志字

旅初六旅瑣瑣斲其所取災謹按斲字並合作斲賤
之義不合作斯

巽彖重巽以申命命乃行也謹按命乃行也一句誤入註

渙彖曰利涉大川利貞乘木有功也謹按利涉大川下脫利貞字

節彖曰說以行險當位而節中正以通然後乃亨也謹按然後乃亨也一句誤將入註

中孚豚魚吉信及也謹按及字下誤增豚魚字

小過過以利貞與時行也柔得中是以可小事也謹按是以下脫可字小事下誤增吉字

六五象曰密雲不雨已止也謹按經註止字並誤作上字故字上仍脫下字

既濟彖曰既濟亨小小者亨也謹按彖亨小小下脫小字

上繫第九章子曰知變化之道其知神之不爲乎謹按經註不字並誤作所字

第十二章是故聖人有以見天下之賾謹按是故字下誤增夫象字

下繫第四章不見利不動不威不懲謹按動字誤作

勸字

又子曰危以動則民不輔也懼以語則民不應也无交而求則民不與也謹按輔字誤作與字

說卦乾以居之坤以藏之謹按居字誤作君字

序卦屯者物之始生也始生必蒙謹按始字誤作物字

又蒙者蒙昧也謹按脫昧字

又比者親比也謹按脫親字

又物不可以久居其所故受之以遯遯者退也謹按

此一句今本脫者多

雜卦屯見而不失其居註雖見難而盤桓利貞不失其居也謹按註脫難字

又蒙稚而著謹按經註稚字並誤作雜字

讀易私言

元 許衡

初初位之下事之始也以陽居之才可以有爲矣或恐其不安於分也以陰居之不患其過越矣或恐其悞弱昏滯未足以趨時也四之應否亦類此義大抵柔弱則難濟剛健則易行故諸卦柔弱而致凶者其數居多剛健而致凶者惟頤大壯夫而已若總言之居初者易貞居上者難貞易貞者由其所適之道多難貞者以其所處之位極故六十四

卦初爻多得免咎而上每有不可救者始終之際其難易之不同蓋如此

艮六居初者凡八陰柔處下而其性好止故在謙則合時義而得告在咸則感未深而不足進也以是才居遁則後於人而有厲然位卑力弱反不若不往之爲愈也蹇之時險在前也止而不往自有知幾之譽勉於進則陷乎險也艮以止於初爲義故但戒以利永貞漸之才宜若此也雖小子有言於義何咎旅雖有應而不足援也斯其所以瑣乎

小過宜下而反應於上斯其有飛鳥之凶乎柔止之才大率不宜動而有應動而有應則應反爲之累矣

坤六居初者凡八坤柔順處下其初甚微而其積甚著故其處比與否之初也皆獲吉豫有應在上是動於欲而不安其分也凶亦宜乎

二二與四皆陰位也四雖得正而猶有不中之累况不得其正乎二雖不正而猶有得中之美况正而得中者乎四近君之臣也二遠君之臣也其勢又

不同此二之所以多譽四之所以多懼也二中位
陰陽處之皆爲得中中者不偏不倚無過不及之
謂其才若此故於時義爲易合時義旣合則吉可
斷矣究而言之凡爲陽者本吉也陽雖本吉不得
其正則有害乎其吉矣雖得正矣不及其中亦未
可保其吉也必也當位居中能趨時義然後其吉
乃定凡爲陰者本凶也陰雖本凶不失其正則緩
乎其凶矣苟或居中猶可免其凶也必也不正不
中悖於時義然後其凶乃定故陽得位得中者其
吉多焉陰失位失中者其凶多焉要其終也合於
時義則無不吉悖於時義則無不凶也大矣哉時
之義乎

凡陽本吉凡陰本凶陽雖本吉不得其正則害乎
吉矣得正矣不及其中亦未保其吉也必當位居
中能趨時義然後其吉乃定陰雖本凶不失其正
則緩其凶矣失正矣或能居中猶可免其凶也必
也不正不中悖於時義然後其凶乃定故陽得位
得中其吉多焉陰失位失中其凶多焉要其終也

合於時義則無不吉悖於時義則無不凶也大矣哉時之義乎

乾九二九剛健之才也而承乘又剛健是剛健之至也處陰得中有溥博淵泉時出之義臣才若此其於職位蓋綽綽然有餘裕矣夫剛健則有可久之義得中則有適時之義兼二者而得雖無應可也况五六虛中以待已者乎此八卦所以無悔吝而有應者尤爲美也

兌九二兌之九二剛而得中也雖上承於柔邪不足爲累此以得中之義爲務也獨節之爲卦自有中義所不足者正而已今旣不正矣其何以免於凶乎

巽九二兌之中以剛爲說巽之中以剛爲入皆有才適用之中也然兌務於上巽務於下其勢有所不通如井之義貴於上行也而九二無應徇已才而下之違時拂義人莫肯與以谷射甕敝取象其亦宜乎

坎九二下柔險之始也上柔險之極也而已以剛

陽之才獨處中焉是已無賴於彼而彼有待於已也加以至尊應之則險道大行不爾則幾於困矣大率有應而道行則以貞幹之義爲重無應而處中則以須守之義爲重錯舉而言則卦才皆備焉坤六二否之時不爲窮厄所動豫之時不爲逸欲所牽非安於義分者莫能也坤六二居中履正且又靜而順焉宜其處此而無敗也雖然剝物兼人陽之爲也柔順貞靜陰之德也以陰之德而遇剝觀則剝傷於柔而觀失於固矣夫何故時旣不同

義亦隨異此六爻所以貴中正而中正之中又有隨時之義也

震六二六二陰柔而在動體雖居中履正然下乘剛陽成卦之主其勢不得安而處也非惟其勢不得安而處揆其資性亦不肯安其處也或上應或下依有失得之辨焉復無應而下仁吉之道也過此則違道而非正矣益之方受彼也上下之來又何患焉无妄之世方存誠也或應或依祗足爲累他卦皆以乘剛之義爲重也大率處則乘剛動有

得失非坤二柔中之比也

艮六二以剛處上以柔處下尊卑之勢順也艮之大體既備此象矣而六二又承剛履柔居中得正宜其處諸卦而無過也雖然柔止之才動拘禮制若當大有爲之時則有不可必者固在蹇未能濟處艮莫能止究其用心忠義正直終不可以事之成否爲累也

離六二初與三剛而得正皆有爲之才也然其明照各滯一偏唯六二中正見義理之當然而其才幹有不逮其明者甚矣才智之難齊也得有應於上則明有所附矣然非剛之善用明實明之能自用也大抵以剛用明不若以明用剛之爲順故八卦應五附三其勢略等而離之六五有應於下者爲最美也

三卦爻六位唯三爲難處蓋上下之交內外之際非平易安和之所也故在乾則失於剛暴在坤則傷於柔邪震動而無恒巽躁而或屈離與艮明止係於一偏坎與兌險說至於過極皆凶之道也然乾

之健雖不中也猶可勝任坤之順雖不正也猶能
下人二者之凶比他爻爲少緩若夫坎之與兌以
陰處陽以柔乘剛不中不正悖忤時義其爲凶也
切矣是知乾坤爲輕坎兌爲重總而論之亦曰多
凶而已矣

乾九三過剛而不中難與義適然以其有才也故
諄諄焉戒命之曰夕惕曰敬慎曰艱貞庶乎有可
免者不然則用所偏而違乎義矣凶其可逃乎

四四之位近君多懼之地也以柔居之則有順從之

美以剛居之則有僭逼之嫌然又須問居五者陰
邪陽邪以陰承陽則得於君而勢順以陽承陰則
得於君而勢逆勢順則無不可也勢逆則尤忌上
行上行則凶咎必至離之諸四皆是也震則四爲
成卦之主才幹之臣也是動而知戒是以有補過
之道以陽乘陽以陰乘陰皆不得於君也然陽以
不正而有才陰以得正而無才故其勢不同有才
而不正則貴於寡欲故乾之諸四例得免咎而隨
三四夬之四有凶悔之辭焉無才而得正則貴乎

讀易私言
有應故艮之諸四皆以有應爲優無應爲劣獨坤
之諸四能以柔順處之雖無應援亦皆免咎此又
隨時之義也

乾九四九而居四勢本不順然以其健而有才焉
故不難於趨義又上卦之初未至過極故多爲以
剛用柔之義以剛而用柔是有才而能戒懼也有
才而能戒懼雖不正猶吉也

兌九四處下而說則有樂天之美處上而說則有
慕爵之嫌初九雖無應猶可也九四雖有應尚多

戒辭也然以剛說之才易得勝任故有應者無不
吉而無應者亦有免之之道云

離九四陽處近君而能保其吉者以其有才而敬
慎故也火性上炎動成躁急非惟不順君之所用
且反爲君之所忌也恣橫專愒鮮有不及唯噬嗑
之去間睽離之相保與羈旅而親寡之時取君義
爲甚輕故其所失亦比他爻爲甚緩究而言之固
非本善之才也

震九四離之成卦在乎中故以中爲美震之成卦

在乎下故以下爲貴若是則震之九四乃才幹之
臣也君之動由之師之動亦由之其功且大矣其
位已逼矣然而卒保其無禍者何哉蓋震而近臣
君有戒慎恐懼之義以陽處陰有體剛用柔之義
持其術以往其多功而寡過也宜乎雖然功大位
逼而不正不可以久居其所也久居其所則勲德
反下此恒之所以戒於田無禽歟
巽六四陰柔之質自多懼也順入之才能承君也
以是而處每堪其任故八卦瑞無凶悔之辭

坎六四其以陰柔得位而上柔中正之君略與巽
同然又有險之性焉此以處多懼之地則宜矣故
八卦亦無凶悔之辭

艮六四以柔止之才承柔止之君雖已身得正而
於君事則有不能自濟者必藉剛陽之才而後可
以成功故離九應之則終得婚媾震九應之則顛
頤獲吉至於止乾之健納兌之說皆可成功而有
喜不爾處剝見凶處蒙蠱見吝矣艮以能止爲義
能止其身則无咎可也

坤六四坤之六四不問有應與否皆無凶咎蓋爲臣之道大體主順不順則無以事君也

五五上卦之中乃人君之位也諸爻之德莫精於此故在乾則剛健而斷在坤則重厚而順未或有先之者至於坎險之孚誠離麗之文明巽順於理艮篤於實能首出乎庶物不問何時克濟大事傳謂五多功者此也獨震忌強輔兌比小人於君道未善觀其戒之之辭則可知

乾九五剛健中正得處君位不問何時皆無悔咎惟履之剛決同人私暱不合君道故有厲有號咷也

兌九五下履不正之強輔上比柔邪之小人非君之善道也然以其中正也故下有忌而可勝上有說而可決大哉中正之爲德乎

離六五強輔強師而六以文明柔中之才而麗之悔可忘也事可濟也然更得九二應之爲貴故大有睽鼎未濟皆吉而他卦止以得中爲免耳

震六五九四陽剛不正之臣爲動之主而六五以

柔中乘之其勢可嫌也得九二剛中應之其勢頗
振動故恒大壯解歸妹比他卦爲優而豐之二五
以明動相資故其辭亦異焉勝於豫震小過之无
應也

巽九五以巽順處中正又君臣相得而剛柔相濟
相德則無內難相濟則有成功不待於應自可无
咎應則充爲美也以巽順之道處中正之位君與
臣相得也剛與柔相濟也相得則無內起之難相
濟則有成功之理不待於應而自能无咎也

坎九五以剛陽之才處極尊之位中而且正可以
有爲也然適在險中未能遽出故諸卦皆有須待
之義夫能爲者才也得爲者位也可爲者時也有
才位而無其時唯待爲可待而至於可則无咎矣
艮六五君輔皆柔且無相得之義本不可有爲也
以六有靜止得中之才上依而下任也故僅能成
功然非可大有爲也更或無應是不得於臣又不
得於民於君道何取焉

坤六五坤六居五雖不當位然柔順重厚合於時

讀易和言
中有君人之度焉得九二剛中應之則事乃可濟
故師泰臨升或吉或无咎而他卦則戒之之辭爲
尤重蓋陰柔之才不克大事且鮮能永貞故也
上上事之終時之極也其才之剛則柔內之應否雖
或取義然終莫及上與終之重也是故難之將出
者則指其可由之方事之既成者則示以可保之
道時甚足貴也時過適則難與行也義之善或不
必勸則直云其吉也勢之惡或不可解則但言其
凶也有始不得志而終无咎者有始饜其欲而終

有禍敗者執其偏而用者才尚可也反其常而動
者事已窮也質雖不美而冀其或改焉則猶告之
位雖處極而見其可行焉則亦諭之良有成終之
義故八卦皆善履係於所履觀係於所生吉凶不
敢妄言也大抵積微而盛過盛而衰有不可變者
有不能不變者六爻教戒之辭唯此爲最少大傳
謂其上易知豈非事之已成乎

元包數義

臨邛張行成

元包以坤先乾歸藏之易也易者變也天主其變包者藏也地主其藏天統乎體八變而終于十六易用四十九著者存掛一之數爲太極則六八四十八者體中之用也地分乎用六變而終于十二包用三十六著者以共一之數爲太一則六六三十六者用中之用也太玄本三十六著亦地數也地虛三以扮天故用三十三掛一而三十二則四八之數地之體也

玄之爲書以一元行乎地之四體之間四體卽方州部家是也故玄之掛一有天用地之義而虛三有地承天之義若元包三十六不掛不虛而每揲存二十四則八卦用於地上者也是故乾三奇震坎艮各得其一巽離兌各得其二則十二畫也坤三偶巽離兌各得其一震坎艮各得其二則二十四畫也陰陽之畫共三十六以陰之二載陽之一則三十六畫爲用矣故易老陽之策極于四九而包以六六用之易以兩卦相重而後天地合包亦以兩揲相通而後九六

均是故卦數自一至八凡三十六重之而七十二一揲之著合乎單卦之數兩揲之著合乎重卦之數五行之數五十有五自三十六言之五行盈於八卦十九當閏數之物自七十二言之八卦盈於五行十七當運數之氣以八歸五氣類相從則乾兌爲金坤艮爲土震巽爲木坎爲水離爲火吉凶順逆占法由生故曰三十有六取數於乾坤五行八卦同符合契也其法分而爲二以三揲之左右各存三三十二著所謂管之以四以象四時也常存此數不用者坤之二

十四氣爲萬化之基易存四卦之義也餘十二著則
爻數與歸奇數也爻數不九卽六歸奇數不六卽三
爻數得九者陽畫也歸奇數則三矣爻數得六者陰
畫也歸奇數則六矣陽畫九而歸奇三用者三不用
者一也陰畫六而歸奇六用不用各半也三畫皆陽
者乾也皆陰者坤也二陽一陰者三女也二陰一陽
者三男也三畫皆陽其數二十七重之而五十四者
六九也三畫皆陰其數十八重之而三十六者六六
也二陽一陰其數二十四重之而四十八者六八也

二陰一陽其數二十一重之而四十二者六七也此
八重卦之本數亦六七八九之數而以六爲主者也
大衍六七八九之數以求爻也爻者用也六七八九
皆祖乎四者用生乎體自四揲而來也元包六七八
九之數以求卦也卦者體也六七八九皆祖乎六者
體生乎用自六爻而來也以用爲主故易爲天以體
爲主故包爲地也乾之一卦得五十四歸奇一十八
坤之一卦得三十六歸奇亦三十六三男四十二歸
奇三十三女四十八歸奇二十四以五十四合三十

元包數義 八
六則九十也以四十八合四十二亦九十也以十八
合三十六則五十四也以三十合二十四亦五十四
也故元包八卦爻數合之爲三百六十歸奇數合之
爲二百一十六總之而五百七十有六得先天八位
之卦數與大衍除掛一而用四十八著十二用之數
正同所不同者大衍以四爲一故兩卦相偶用不用
之數卽得五百七十有六元包以一爲一比大衍數
四分僅得其一蓋大衍兼用七八九六分于男女者
太極用八卦天地之數也元包專用九六宗于父母

者八卦自用人物之數也是故大衍五十之虛一天
之虛之極也四十九之合一地之有之極也四十九
之掛一人之用之極也在四十八用之外元包以共
一爲太一是四十九合一之義爾揲之以三爲三才
在三十六用之內故易揲之以四以象四時備四體
而致用者天用地也包管之以四以象四時存四體
而不用者地用物也此所以大小不同也元包存本
之數每揲二十四一卦六揲而百四十四凡六十四
卦九千二百一十有六則大衍五百一十二卦之著

存乾坤坎離四卦不用之策數也包所存之數亦地之本數故與大衍同大衍從天故又有掛一之數三千七十二包四分得其三乃地之用數也包八卦之數乾五十四而八之則四百三十二坤三十六而八之則二百八十八三男四十二而八之各三百三十六三女四十八而八之各三百八十四乾歸奇數十八而八之則一百四十四坤歸奇數三十六而八之則二百八十八三男歸奇數三十而八之各二百四十三女歸奇數二十四而八之各一百九十二總卦

數計二千八百八十則三百六十之八也總歸奇數計一千七百二十八則二百一十六之八也一千七百二十八則七十二之二十四二千八百八十則七十二之四十共六十有四以地之體十六析之卦數得其十歸奇得其六皆二百八十八也以先天準之卦數之十爲離之顯仁則開物八萬六千四百之數歸奇之六五爲坎之藏用則閉物四萬三千二百之數一爲存本則八千六百四十之閏數然先天視元包皆三十倍矣此元包與大衍先天之合也所譚八

卦自用者陰陽分爲八位各以一卦變七卦自一世至五世遊魂歸魂而卦體復各守本體其一不變故曰八卦自用其數也今世十筮所用火珠林卽是此法而其文不雅先生著書欲傳此一法於後世爾非爲文也分而爲二自左揲至右終而爻見奇則復歸于左故曰數之閏也在於左陽之動也數之萌也在於右陰能生也大衍四十九著各以一卦變六十四卦其數之變至于一十五萬五百二十八則每著得三千七百二元包三十六著各以一卦變八卦其數

之變至于一萬三千八百二十四則每著得三百八十四三千七十二者三百八十四之八也

大衍四十九著

先除掛一一著計三千七十二存天之太極也

再除三揲三掛三著計九千二百一十六爲乾坤坎離四卦之數存地之太極也

實用四十五著以應一卦當一節之數計一十三萬八千二百四十則六十六卦三百六十爻每爻用三百八十四地生物之數也

元包三十六著

先除二十四著計九千二百一十六則乾坤坎離存本之數也

餘一十二著之用卦數通歸奇計四千六百八則震巽艮兌反復迭用之數也易之著四十八而策窮于三十六者乾與坤坎與離反復不互見爲四卦故各當十二震巽艮兌反復互見爲二卦故共當十二而十二常不見是故元包之著三十六存二十四不用之外所用者十二而已一萬三千八百二十四析而

十之卽一十三萬八千二百四十地之生物全數也九千二百一十六析而十之則九萬二千一百六十地開物之數也四千六百八析而十之節四萬六千八十地閉物之數也開物者易用策之數閉物者易歸奇之數歸奇之數易之物數也蓋全數十二會三分之天地各用其一餘一分以爲人物也兩揲七十二著各存二十四者存坤之體也歸奇共九策者存乾之用也通之用五之三不用十九之三者用其冲氣存其物體也

元包數書
存本數每卦百四十四歸奇數均之每卦二十七用
策均之每卦四十五以歸奇合存本每卦一百七十
一則太玄九章之數者閏數也以用策合存本每卦
百八十九全之而三百七十八則太玄五日三辰之
策者餘分數也以用策併歸奇每卦七十二則太玄
一日之策數者晝夜之數也

積著記

元 劉因

著之在積也寂然不動道之體立所謂易有太極者
也及受命而出也感而遂通神之用行所謂是生兩
儀兩儀生四象四象生八卦八卦定吉凶生大業者
也猶之圖也不用五與十不用云者無極也而五與
十則太極也猶之易也潔靜精微潔靜云者無極也
而精微則太極也知此則知夫積中之著以一而具
五十無用而無所不用謂之無則有謂之實則虛也

而其數之流行於天地萬物之間者則亦陰陽奇偶而已矣故自掛扐之奇而十二之則陽奇而進之不及夫偶者爲少陰陰偶而退之不及夫奇者爲少陽而四之則三四五六合夫畫奇全偶半合夫數而畫亦於是焉合其多少則合其位之陽少而陰多故有自一進一而爲偶自偶退一而爲奇之象也自過揲之策而十二之陽奇而退之不及夫偶者爲少陰陰偶而進之不及夫奇者爲少陽而四之則六七八九合夫數奇三偶二合夫畫而數亦於是焉合其多少

則合其數之陽實而陰虛故有自一虛中而爲偶自二實中而爲奇之象也蓋掛扐之奇徑一而過揲之奇圍三而掛扐過揲之偶鈞用半也故分掛扐過揲而橫觀之則以陰爲基而消長有漸分四象而縱觀之則亦以陰爲平而低昂有漸其十二之則自右一而二自左二而三其四之則自右三而六自左六而九如水之流行觸東而復西其消長則其自然之淪漪其判合則其盈科而後進者也此皆自夫一行邵子之說而得之知此則知夫誤推一行三變八卦之

象謂陰陽老少不在乎過揲者爲昧乎體用之相因而誤推邵子去三用九之文謂七八九六不在乎掛扐者又昧乎源委之分也由此而極其奇偶之變以位則陽一而陰二也以數則天三而地兩也初變之徑一而圍三以爲奇者三而得之是以老陽少陰之數多也後二變之圍四用半以爲偶者二而得之是以少陽老陰之數少也分陰分陽則襍一變皆奇而後二變皆偶也迭陰迭陽則去掛一初一變皆偶而後二變皆奇又如畢中和天地人之說也其變也自

一生二二生四而又四之四生八八生十六而言則畫卦之象也自四乘而十六十六乘而六十四則重卦之數也故初變而得兩儀之象者二畫卦之數也再變而得四象之象者四畫卦之數也三變而得八卦之象者六畫卦之數也自兩儀之陰陽而言其用數則乾兌離震皆十二而巽坎艮坤皆四也自八卦之陰陽而合其體數則乾坎艮震三十二而巽離坤兌三十二也自二老二少之陰陽而言其饒乏之數則又如四象之七八九六也六變而得四象之

畫則每位之靜變往來得十畫卦之數也又二畫則
總其數矣其數也皆靜者爲多變者爲少而一爻變
者居中二靜與變皆老陰爲多老陽爲少而二少居
中積畫成卦則每卦之靜變往來得十五畫卦之數
也又三畫則總其數矣其數也亦皆靜極者爲至多
而變極者爲至少而又一爻二爻進退於其間其靜
與變則皆坤爲至多乾爲至少而三男三女進退於
其間因而重之則每卦之靜變往來得三十畫卦之
數也八六畫則總其數矣其進退多少皆與八卦之

例同也此皆自歐陽子七八常多九六常少之一言
而推之與夫後二變不掛不知其爲陰而使二老之
數與成卦同二少之數與二老同而參差益甚其初
一變必鈞不知其爲陽而於乾坤六子之率勉強求
合乃若四十九著而虛一與五十著虛一而掛二者
固有間矣此以著求卦者也若夫以卦而求變也則
自夫交易已成之體爲變易應昔之用由兩儀而上
自紆而促八卦循環而其序不亂以遠御近以下統
上而皆有文之可尋也以變而求占也則自靜極而

極書言
左之一二三四五自動極而右之一二三四五極自
用其極而一則專其一居兩端而分屬焉二則分其
爻居次兩端而分屬焉動則上爻重而靜則下爻重
也三則分其卦居中自爲兩端而分屬焉前則本卦
重而後則之卦重也動中用靜靜中用動靜多主貞
動多主悔而皆有例之可推也然自此而極言之則
以六甲納之其卦之序不亂也以互取之其序有漸
而亦不亂也以伏求之其序亦有漸而不亂也以世
位反圖而推之則一而二二而四四而八八而十六

進退有序逆順以類而不亂也以策數卽圖而致之
則在兩儀而一消長在四象而二消長在八卦而四
消長在十六而八消長在三十二而十六消長故長
中八消消中八長皆震爲巽之消而坤爲乾之消與
爲坤之長而乾爲震之長而不亂也以揲變之數應
圖而推之則其多少又合乎一一爲乾八八爲坤以
少爲息以多爲消而亦不亂也是則按圖畫卦揲著
求卦莫不脗合矣然而朱子猶以大衍爲不自然于
河圖而變揲之左可以形右卦畫之下可以形上者

又以為短於龜也其三索之說則一行有成說既取之于本義後復以為不必然而卦之陰陽之奇偶畫與位合則大傳有明文既著之筮說而不明言于啓蒙是又恐後人求之過巧而每遺恨不能致古人之詳者也若以奇策之數合之圓圖之畫則四十八一卦之畫也其奇之十二即乾之陰而策之三十六即其陽也三十六自九進而得之也九陽也三十六亦陽也全陽也其奇之二十即兌離之陰也而策之二十八即其陽也二十八自七進而得之也七陽也二

十八陰也陽合於陰也其奇之二十四則坤所去之半也而策則所用之二十四陰也二十四自六進而得之也六陰也二十四亦陰也全陰也其奇之十六即艮坎自上所去之十六也而策之三十二即其所用之半并上所餘之八陰也三十二自八進而得之也八陰也三十二陽也陰合於陽也其震巽之不用則猶乾之不用陰坤之不用陽也其奇策之八方數之變也掛扐之六圓數之變也此邵子之說也然前之奇策之所當陰不若陽之齊後之六八之所應

橫著記
圓不若方之備是必有深意也第未能攷而知之又不知朱子之意以為如何此因橫著而記之至元十年春二月吉日橫成記

論語筆解

唐 韓愈

學而第一

有子曰信近於義言可復也

馬曰其言可反覆故曰近義

反本要終謂之復言行合宜終復乎信否則小信未孚非反覆不定之謂

恭近於禮遠恥辱也

馬曰恭不合禮非禮也能遠恥辱故近禮

禮恭之本也知恭而不知禮止遠辱而已謂恭必以禮為本

因不失其親亦可宗也

孔曰因親也所親不失其親亦可宗敬

因訓親非也孔失其義觀有若上陳信義恭禮之本下言凡學必因上禮義二說不失親師之道則可尊矣

子曰敏於事而慎於言就有道而正焉可謂好學也

矣

孔曰敏疾也有道有道德者正謂問事是非

正謂問道非問事也上句言事下句言道孔不分釋之則事與道混而無別矣

為政第二

子曰詩三百一言以蔽之曰思無邪

包曰蔽猶當也又曰歸於正也

蔽猶斷也包以蔽為當非也按思無邪是魯頌之辭仲尼言詩最深義而包釋之略矣

子曰吾五十而知天命

孔曰知天命之終始

天命深微至賾非原始要終一端而已仲尼五十學易窮理盡性以至於命故曰知天命

六十而耳順七十而從心所欲不踰矩

鄭曰耳聞其言知其微音

也馬曰矩法也從心所欲無非法

耳當為爾猶言如此也既知天命又如此順天也

子曰溫故而知新可以為師矣孔曰溫尋也尋釋故者又知新者可以為

師矣

先儒皆謂尋釋文翰由故及新此是記問之學不足為人師也吾謂故者古之道也新謂已之新意可為新法

子曰君子不器子貢問君子子曰先行其言而後從之孔曰疾小人多言而行不周

上文君子不器與下文子貢問君子是一段義孔失其旨反謂疾小人有戾於義

子張問十世可知也子曰殷因於夏禮所損益可知也周因於殷禮所損益可知也其或繼周者雖百世

可知也孔曰文質禮變馬曰所因謂三綱五常所損益謂文質三統

孔馬皆未詳仲尼從周之意泛言文質三統非也後之繼周者得周禮則盛失周禮則衰孰知因之之義其深矣乎

八佾第三

季氏旅於泰山子謂冉有曰女弗能救與對曰不能子曰嗚呼曾謂泰山不如林放乎馬曰救止也包曰泰山之神反不如

林放者乎

謂當作爲字言冉有爲泰山非禮反不如林放問禮乎包言泰山之神非其義也

子曰吾不與祭如不祭

包曰不自親祭使攝者爲之不盡敬與不祭同

義連上文禘自既灌而往吾不欲觀之矣蓋魯僖公亂昭穆祭神如神在不可躋而亂也故下文云吾不與祭蓋嘆不在其位不得以正此禮矣故云如不祭言魯逆祀與不祀同焉

子貢欲去告朔之餼羊

鄭曰禮人君每月告朔於廟有祭謂之廟享

人君謂天子也非諸侯通用一禮也魯自文公六年閏月不告朔猶朝於廟左氏曰不告朔非也吾謂魯祀周公以天子禮魯君每月朔不朝於周但朝周公之廟因而祭曰廟享其實以祭爲重爾文公既不行告朔之享而空朝於廟是失禮也然子貢非不知魯禮之失特假餼羊之間誠欲質諸聖人以正其禮爾又曰天子云聽朝謂聽政於天下也諸侯云告朔謂以下之政告於上也每月頒朔於諸侯諸侯稟朔奉王命藏祖廟於是魯有廟享

之文他國則亡此禮

里仁第四

子曰君子之於天下也無適也無莫也義之與比無適無可也無莫無不可也惟有義者與相親比

爾

子曰君子懷德小人懷土君子懷刑小人懷惠

孔曰懷德

懷安也懷土重遷也懷刑安於法也包曰懷惠思惠也

德難形容必示之以法制土難均平必示之以恩惠上下二義轉相明也

子曰參乎吾道一以貫之曾子曰唯子出門人問曰

何謂也曾子曰夫子之道忠恕而已矣

孔曰直曉不問故答曰唯

說者謂忠與恕一貫無偏執也

子游曰事君數斯辱矣朋友數斯疏矣

包曰數謂速數之數

君命召不俟駕速也豈以速為辱乎吾謂數當謂頻數之數

公冶長第五

子使漆雕開仕對曰吾斯之未能信子說

未能見信於時未可以仕也子說者善其能忖已

知時變

子謂子貢曰女與回也孰愈對曰賜也何敢望回回也聞一以知十賜也聞一以知二子曰弗如也吾與

女弗如也

包曰既然子貢不如復云吾與女俱不如者蓋欲以慰子貢爾

回亞聖矣獨問子貢孰愈是亦賜之亞回矣賜既發明顏氏具聖之體又安用慰之乎包失其旨吾觀子貢此義深微當得具體八分所不及回二分爾不然安得仲尼稱弗如之深乎

宰子晝寢子曰朽木不可雕也糞土之牆不可朽也

於子與何誅

舊文作晝字

晝當為晝字之誤也宰子四科十哲安得有晝寢之責乎假或偃息亦未深誅又曰於子顯是言宰子也下文云始吾今吾者即是仲尼自謂也

子貢曰夫子之文章可得而聞也夫子之言性與天道不可得而聞也

也聞

孔說粗矣非其精蘊吾謂性與天道一義也若解二義則人受以生何者不可得聞乎哉

雍也第六

子曰人之生也直罔之生也幸而免

馬曰人之生自終者以其正直

也包曰誣罔正直是幸也

直當為德字之誤也言人生稟天地大德罔無也

若無其德免於咎若鈔矣

古書德作惠

子曰齊一變至於魯魯一變至於道

包曰齊可使如魯魯可使如大

道行之時

道謂王道非大道之謂

子曰君子博學於文約之以禮亦可以弗畔矣夫

曰鄭

弗畔不違道也

畔當讀如偏畔之畔弗偏則得中道

子見南子子路不說夫子矢之曰予所否者天厭之

天厭之

孔曰行道非婦人之事與之咒誓義可疑焉

矢陳也否當為否泰之否厭當為厭亂之亂孔失

之矣為誓非也後儒因以誓又以厭為撼益失之

矣吾謂仲尼見衛君任南子之用事乃陳衛之政

理告子路云予道否不得行汝不須不悅也天將

厭此亂世而終豈泰吾道乎

述而第七

子曰述而不作信而好古竊比於我老彭

包曰若老彭祖述之

而

先儒多謂仲尼謙詞失其旨矣吾謂仲尼傷已不遇嘆其道若老彭而已

殷賢惟伊傅餘固茂稱

子曰自行束脩以上吾未嘗無誨焉

孔曰言人能奉禮自行束脩以

上則皆教誨之焉

說者謂束為束帛脩為羞脯人能奉束脩於吾則

皆教誨之此義失也吾謂以束脩為束羞則然矣行吾而教之非也仲尼言小子洒掃進退束脩未事但能勤行此小者則吾必教誨其大者

冉有曰夫子為衛君乎子貢曰諾吾將問之入曰伯

夷叔齊何人也曰古之賢人也曰怨乎曰求仁而得

仁又何怨出曰夫子不為也

鄭曰父子爭國惡也孔子以夷齊賢且仁故知

不助衛君明矣

上篇云伯夷叔齊不念舊惡怨是用希此言君子雖惡不怨也又下篇云不降其志不辱其身伯夷

叔齊歟我則異於是無可無不可吾嘗疑三處言
夷齊各不同吾謂此段義稱賢且仁者蓋欲止冉
有為衛君而已

習之深乎哉吾今乃知仲尼之言瞻之在前忽然
在後不可槩窺其極

子所雅言詩書執禮皆雅言也

孔曰雅音正言也鄭曰先王典法必正言

其音然
後義全

音作言字之誤也傳寫因注云雅音正言遂誤爾

泰伯第八

子曰恭而無禮則勞慎而無禮則蕙勇而無禮則亂

直而無禮則絞

王曰蕙懼
貌絞刺也

王注云不以禮節之吾謂禮者制中者也不及則
為勞為蕙過則為亂為絞絞確也

上篇云中庸之為德也其至矣乎民鮮久矣此正
謂言禮之皇極也

子曰興於詩立於禮成於樂

包曰興起也禮所以立身樂以成性

三者皆起於詩而已先儒略之遂惑於二矣

子曰惟天為大惟堯則之蕩蕩乎民無能名焉

包曰布德

廣遠民無能識其名

堯仁如天不可名狀其高遠非不識其名也

子罕第九

子罕言利與命與仁

包曰寡能及之故希言

仲尼罕言此三者之人焉非謂罕言此三者之道也

子絕四毋意毋必毋固毋我

王曰不任意無專必無固行無有其身也

此非仲尼自言蓋弟子記師行事其實子絕二而已吾謂無任意即是無專必也無固行即是無有

已身也

子曰鳳鳥不至河不出圖吾已矣夫

孔曰聖人受命則鳳凰至河出

圖今無此瑞吾已矣夫者傷不得見也河圖迺入卦是也

王道盛則四靈為畜非但受命符爾

顏淵喟然嘆曰仰之彌高鑽之彌堅瞻之在前忽然在後夫子循循然善誘人博我以文約我以禮欲罷不能既竭吾才如有所立卓爾雖欲從之末由也已

包曰恍惚不可得而形容孔曰不能及夫子之所立

既竭吾才如有所立卓爾此回首自謂雖卓立未

能及夫子高遠爾

子路使門人爲臣

鄭日子路欲使弟子行爲臣之禮也

先儒多惑此說以謂素王素臣後學由是責子路欺天吾謂子路剛直無諂必不以王臣之臣欺天爾本謂家臣之臣以事孔子也

子曰可與共學未可與適道可與適道未可與立可

與立未可與權

孔曰雖能之道未必能有所立雖有所立未必能權量輕重

孔注猶失其義夫學而之道者豈不能立耶權者經權之權豈輕重之權耶吾謂正文傳寫錯倒當

云可與共學未可與立可與適道未可與權如此則理通矣

鄉黨第十

吉月必朝服而朝

孔曰吉月月朔也吉服卽皮弁服也

吉禮所行月日因而謂之吉月吉日非正朔而已

鄉人儺朝服而立於阼階

孔曰儺驅逐疫鬼恐驚先祖故朝服而立於廟之阼階

正文無廟字又云恐驚先祖疑孔穿鑿非本旨

子曰山梁雌雉時哉時哉子路共之三嗅而作

周日子路

其之非本意不苟
食故三嗅而作

以為食具非其旨吾謂嗅當為鳴鳴之鳴雉之聲也

先進第十一

子曰從我於陳蔡者皆不及門也

鄭曰皆不及仕進之門而失其所

門謂聖人之門言弟子學道由門以及堂由堂以及室分等降之差非謂言仕進而已

德行顏淵閔子騫冉伯牛仲弓言語宰我子貢政事

由有季路文學子游子夏

說者曰字而不名非夫子云

論語稱字不稱名者多矣仲尼既立此四品諸弟

子記其字而不名焉別無異旨

德行科最高者易所謂默而識之故存乎德行蓋

不假乎言也言語科次之者易所謂擬之而後言

議之而後動擬議以成其變化不可為典要此則

非政法所拘焉政事科次之者所謂雖無老成人

尚有典刑言非事文辭而已文學科為下者記所

謂離經辨志論學取友小成大成自下而上升者

也

子曰回也其庶乎屢空賜不受命而貨殖焉億則屢

中注曰回庶幾聖道雖數空匱而樂在其中賜不受

教命唯財貨是殖億度是非蓋美回所以勵賜也

一說屢猶每也空猶虛中也此近之矣謂富不虛

心此說非也吾謂回則坐忘遺照是其空也賜未

若回每空而能中其空也貨當為資植當為權字

之誤也子貢資於權變未受性命之理此蓋明賜

之所以亞回也

子張問善人之道子曰不踐迹亦不入於室

孔曰善人不但

循舊迹亦少創業亦不能入聖人之奧室

孔說非也吾謂善人即聖人異名爾豈不循舊迹

而又不入聖人之室哉蓋仲尼誨子張言善人不

可循迹而至於心室也聖人心室惟奧惟微無形

可觀無迹可踐非子張所能至爾

子曰論篤是與君子者乎色莊者乎

孔曰論篤是口無擇言君子是

身無擇行色莊者不惡而嚴

孔失其義吾謂論者討論也篤極也是此也論極

此聖人之道因戒子張但學君子容色莊謹即可

子畏於匡顏淵後子曰吾以女為死矣日子在回何

敢死

包曰言夫子在已無所敢死也

死當為先字之誤也上文云顏淵後下文云回何

敢先其義自明無死理也

點爾何如至童子六七人浴乎沂風乎舞雩詠而歸

孔曰暮春季春三月

浴當為浴字之誤也周三月夏之正月安有浴之

理哉

顏淵第十二

顏淵問仁子曰克己復禮為仁

馬曰克己約身也禮曰復返也身能返禮

則為仁矣

孔馬得其皮膚未見其心焉吾謂回問仁仲尼答

以禮蓋舉五常之二以明其端焉故下文云非禮

勿視非禮勿聽非禮勿言非禮勿動又舉五常之

四以終其義

子曰博學於文約之以禮亦可以弗畔矣夫

簡編重錯雍也篇中已有君子博學於文約之以

禮可以弗畔矣夫今削去此段可也

子張問士何如斯可謂之達矣子曰夫達也者質直而好義察言而觀色慮以下人

馬曰常有謙退之志

此與上篇色莊者乎一義也皆斥言子張質直莊謹下於人則為達士矣

子路第十三

冉有退朝子曰何晏也對曰有政子曰其事也如有政雖不吾以吾其與聞之

馬曰政者有所改更匡正事者凡行常事我為大夫

雖不見任用必當與聞之

政者非更改之謂也事者非謂常行事也吾謂凡

于典禮者則謂之政政即常行焉則謂之行行其常則謂之人事

子貢問曰何如斯可以為士矣子曰宗族稱其孝焉

鄉黨稱其悌焉

舊本子曰行已有耻為上文簡編差失也

孝悌為百行之本無以上之者

曰敢問其次曰行已有耻使於四方不辱君命可謂士矣曰敢問其次曰言必信行必果硜硜然小人哉

抑亦可以為次矣

孔曰有耻者有所不為鄭曰硜硜小人之貌也

硜硜敢勇貌非小人也小當為之字古文小與之

相類傳之誤也上文既云言必信行必果豈小人為耶當作之人哉於義得矣

子曰善人教民七年亦可以即戎矣

即就戎兵也

七年義不解吾謂即戎者衣裳之會兵車之會皆謂即戎矣此是諸侯朝會於王各修戎事之職按王制云三年一聘五年一朝仲尼志在尊周故言五年可以即戎事朝天子七年者字之誤歟

噫習之可謂究極聖人之奧矣先儒但以攻戰為即戎殊不思仲尼教民尊周謹朝聘所以警當世

諸侯舉七年而元年十一年從可知矣

憲問第十四

子曰君子而不仁者有矣夫未有小人而仁者也

孔

雖君子猶未能備

仁當為備字之誤也豈有君子而不仁者乎既稱小人又豈求其仁耶吾謂君子才行或不備者有矣小人求備則未之有也

子曰古之學者為己今之學者為人

孔曰為己履而行之為人徒能

言之也

爲已者謂以身率天下也爲人者謂假他人之學以檢其身也孔云徒能言之是不能行之失其旨矣

子曰君子道者三我無能焉仁者不憂知者不惑勇者不懼子貢曰夫子自道也

子貢慮門人不曉仲尼言我無能焉故云自道以明有能也

子貢方人子曰賜也賢乎哉夫我則不暇

孔曰比方人也不暇

人比方

不暇比方人者其旨安在吾謂義連上文云夫君子自道者我無能此是比方君子之言也惟子貢明之故門人記子貢方人四字下文曰賢乎哉善子貢能知我比方人耳復云不暇者終自晦也

子曰作者七人矣

包曰長沮桀溺丈人石門荷蕢儀封人楚狂接輿

包氏以上文連此七人失其旨吾謂別段非謂上文避世事也下文子曰別起義端作七人非以隱避爲作者明矣避世本無爲作者本有爲顯非一義

齊魯記言無不脫舛七人之數固難條列但明作者實非隱淪昭昭矣

仲尼本至誠如此乎但學者失之云耳

原壤夷俟子曰老而不死是謂賊以杖扣其脛

馬曰夷踞

俟待也孔曰扣擊也

古文叩扣文之誤也當作指為夷俟踞足原不自知失禮故仲尼既責其為賊又指其足脛使知夷踞之罪非擊之明矣

衛靈公第十五

衛靈公問陳於孔子對曰俎豆之事則嘗聞之矣軍

旅之事未之學也

鄭曰本末立不可教以末事

俎豆與軍旅皆有本有末何獨於問陳為末事也

鄭失其旨吾謂仲尼因靈公問陳遂譏其俎豆之

小尚未習安能講軍旅之大乎

子曰由知德者鮮矣

王曰君子固窮而子路慍見故謂之少於知德

此一句是簡編脫漏當在子路慍見下文一段為得

子張問行子曰立則見其參於前也在輿則見其倚

於衡也夫然後行

包曰衡軛也言思念忠信立則常想見參然在目前在輿則倚車軛

參古驂字衡橫木式也子張問行故仲尼喻以車

乘立者如御驂在目前言人自忠信篤敬坐立不

忘於乘車之間

子曰君子義以為質禮以行之孫以出之信以成之

君子哉

鄭曰義以為質謂操行也孫出之謂言語

操行不獨義也禮與信皆操行也吾謂君子體質

先須存義義然後禮禮然後遜遜然後信有次序

焉

子曰吾猶及史之闕文也有馬者借人乘之今亡矣

夫

包曰有古之尺史有疑則闕之有馬不調良則借人乘習之

上何言已所不知必闕之不可假他人之言筆削

也譬如右馬不能自乘而借他人乘之非已所學

耳

子曰君子貞而不諒

孔曰真正也諒信也君子正其道不必小信

諒當為讓字誤也上文云當仁不讓於師仲尼慮

弟子未曉故復云正而不讓謂仁人正直不讓於

師耳孔說加一小字為小信妄就其義失之矣

季氏第十六

孔子曰禮樂征伐自諸侯出蓋十世希不失矣

孔曰希少

也周幽王為犬戎所殺平王東遷諸侯自作禮樂征伐專行始於隱公至昭公十世失政死於乾侯

此義見仲尼作春秋之本也吾觀隱至昭十君誠然矣禮樂征伐自作不出於天子亦然矣若稽諸

春秋吾疑十二公引十世為證非也

其然乎吾考隱公書正月者言周雖下衰諸侯稟朔不可不書也隱攝政不書即位言不預一公之數也定書即位繼體當為魯君不書正月者不稟

朔也稟朔由三桓強盛不由公室也政去公室則

自桓公至定公為十世明矣

深哉先儒莫之知也今驗魯論因知春秋本末惟

季氏篇章學者盍三復其義

自大夫出五世希不失矣

孔曰季文子初得政至桓子五世為家臣陽虎所囚

季孫行父自僖公時得魯政至平子意如逐昭公於乾侯終季孫斯定公八年為陽虎所伐桓子即季孫斯也仲尼既言諸侯十世又言大夫五世者斥魯君臣皆失道也

筆解
陪臣執國命三世希不失矣

馬曰陽虎為季氏家臣至虎三世出奔

定公九年陽貨以葱靈逃奔宋遂奔於晉至哀公

二年陽虎猶見於左傳蓋仲尼自定哀之際三桓

與魯皆衰故春秋止於麟厥旨深矣

孔子曰祿之去公室五世矣

鄭曰魯自東門襄仲立宣公於是政在大夫至

定公五世矣

此重言定公時事也上文十世五世三世希不失

者蓋泛言之耳此云祿去公室五世及下文云政

逮於大夫四世皆指實事言也

陽貨第十七

孔子時其亡也而往拜之

時當為待古音亦作峙南人音作遲其實待為得

子曰性相近也習相遠也子曰惟上智與下愚不移

子曰慎所習上智不可使為惡下愚不可使為賢

上文云性相近是人以可習而上下也此文云上

下不移是人不可習而遷也二義相反先儒莫究

其義吾謂上篇云生而知之上也學而知之次也

困而學之又其次也困而不學民斯為下矣與此

篇二義兼明焉

如子之說文雖相反義不相戾誠知乾道變化各正性命坤道順乎承天不習無不利至哉果天地之心其遠矣乎

公山弗擾以費畔召子欲往至子曰如有用我者吾

其為東周乎

孔曰弗擾為季氏宰與陽虎共執季桓子而召孔子與周道於東方故曰東周

仲尼畏三桓不欲明言往公山氏又不容順子路

當季氏故言吾為東周東周平王東遷能復修西

周之政志在周公典禮不徒往也非子路所測

子路曰佛肸以中牟畔子之往也如之何子曰有是

言也不曰堅乎磨而不磷不曰白乎涅而不淄吾豈

匏瓜也哉焉能繫而不食

孔曰晉大夫趙簡子邑宰不得如不食之物繫滯一

處

此段與公山氏義同有以知仲尼意在東周雖佛

肸小邑亦往矣

子曰由也女聞六言六蔽矣乎好仁不好學其蔽也

愚好知不好學其蔽也蕩好信不好學其蔽也賊

孔曰

六言六蔽者下文謂六事仁智信直勇剛也仁者愛物不知所以裁之則愚蕩無所適守賊者父子不知

相為隱之輩

此三言是泛學五常之有蔽也不言禮與義略也
好直不好學其蔽也絞

絞確也堅確之義

好勇不好學其蔽也亂好剛不好學其蔽也狂孔曰狂妄

也詆觸也

此三者指子路辭也由之為人直勇剛故以絞亂
狂戒之耳

子謂伯魚曰女為周南召南矣乎人而不為周南召

南其猶正牆面而立也與馬曰國風之始三綱之首人而不為如面牆而立

吾觀周南蓋文武已沒成王當國之時九且奠分

陝故別為二南戒伯魚當知此耳

子曰禮云禮云玉帛云乎哉樂云樂云鐘鼓云乎哉

鄭曰所貴安上治民馬曰所貴移風易俗

此連上文訓伯魚之詞也馬鄭但言禮樂大略其
精微

子曰色厲而內荏譬諸小人其猶穿窬之盜也與子

曰鄉原德之賊也孔曰荏柔也內柔佞也周伯曰鄉向也古字同

原類柔字之誤也古文逡巡原柔後人遂誤內柔為鄉原足以明矣

外柔而內厲則尚書所謂柔而立也若外厲而內柔則是穿窬盜賊爾

子曰予欲無言子貢曰子如不言則小子何述焉子曰天何言哉四時行焉

言之為益少故欲無言

此義最深先儒未之思也吾謂仲尼非無言也特設此以誘子貢以明言語科未能忘言至於默識故云天何言哉且激子貢使進於德行科也

微子第十八

微子去之箕子為之奴比干諫而死孔子曰商有三

仁焉

孔注曰三人行異而一同仁其憂亂寧民

殺身成仁比干以之微箕二子校之劣焉仲尼俱稱仁別有奧旨先儒莫之釋也

箕子明夷與文王同乎易象尚書洪範見武王伸其師禮然則箕子非止商之仁也蓋萬世之仁乎齊景公待孔子曰若季氏則吾不能以季孟之間待之子曰吾老矣不能用也孔子行

孔曰魯三卿季氏為上卿最貴孟氏

為下卿不用專言待之以二者之間聖道難行故言老不能用矣

上段孔子行是去齊來魯也下段孔子行是去魯之衛也孔子惡季氏患其強不能制故出行他國周公謂魯公曰君子不施其親不使大臣怨乎不以孔注曰施易也不以他人之親易已之親以用也怨不見聽用周公戒伯禽多矣仲尼獨舉此諷哀公不親信賢人爾施當為弛言不弛慢所親近賢人如此則大臣無所施矣謂施為易非也

子張第十九

子夏曰大德不踰閑小德出入可也

孔曰閑猶法也小德不能不踰

法故曰出入可也

孔註謂大德不自踰法非也吾謂大德聖人也言學者之於聖人不可踰過其門闕爾小德賢人也尚可出入窺見其奧也

孟氏使陽膚為士師問於曾子曾子曰上失其道民

散久矣如得其情則哀矜而勿喜

馬曰哀矜之勿自喜能得其情

哀矜其民散之情勿喜施其刑罰是其旨矣

堯曰第二十

帝臣不蔽簡在帝心

包曰桀居帝臣之位罪過不可隱蔽

帝臣湯自謂也言我不可蔽隱桀之罪也包以桀為帝臣非也

子曰不教而殺謂之虐不戒視成謂之暴慢令致期謂之賊猶之與人也出納之吝謂之有司

至吝嗇於出納者有司之任非人君之道也

孔曰財物當與人而

猶之當為猶上也言君上吝嗇則是有司之財而已

子曰不知命無以為君子

孔曰命謂窮達之分

命謂窮理盡性以至於命也非止窮達

論語拾遺

宋 蘇轍

子少年爲論語畧解子瞻謫居黃州爲論語說盡
取以往今見於書者十二三也大觀丁亥閑居潁
川爲孫籀簡筠講論語子瞻之說意有所未安時
爲權等言凡二十有七章謂之論語拾遺恨不得
質之子瞻也

巧言令色世之所說也剛毅木訥世之所惡也惡之
斯以爲不仁矣仁者直道而行無求於人望之儼然

論語精義
卽之也溫聽其言也厲而何巧言令色之有彼爲是者將以濟其不仁爾故曰巧言令色鮮矣仁又曰剛毅木訥近仁

子貢曰貧而無諂富而無驕何如子曰可也未若貧而樂富而好禮者也夫貧而無諂富而無驕亦可謂賢矣然貧而樂雖欲諂不可得也富而好禮雖欲驕亦不可得也子貢聞之而悟曰士之至於此者抑其切磋琢磨之功至也歟孔子善之曰賜也始可與言詩已矣告諸往而知來者舉其成功而告之而知其所從來者所謂聞一以知二也歟

易曰無思無爲寂然不動感而遂通天下之故詩曰思無邪孔子取之二者非異也惟無思然後思無邪有思則邪矣火必有光心必有思聖人無思非無思也因其自然而吾未嘗思未嘗爲此所謂無思無爲而思之正也若夫以物役思皆其邪矣
終日不食終夜不寢致力於思徒思而無益是以知思之不如學也故十有五而志于學至六十耳目所遇不思而順矣然猶有心存焉以心御心乃能中法

惟無心然後從心而不踰矩故在七十時焉

我與物爲二君子之欲交於物也非信而自入矣譬
如車輪輿旣具牛馬旣設而判然二物也夫將何以
行之惟爲之輓軌以交之而後輪輿得藉於牛馬也
輓軌轅端持輓者也故曰人而無信不知其可也云
云

不仁而久約則怨而思亂久樂則驕而忘患故曰不
仁者不可以久處約不可以長處樂然則何所處之
而可曰仁人在上則不仁者約而不怨樂而不驕管

仲奪伯氏駢邑三百飲蔬食沒齒無怨言與豎刁易
牙俱事桓公終仲之世二子皆不敢動而况管仲之
上哉

仁者無所不愛人之至于無所不愛也其蔽盡矣有
蔽者必有所愛有所不愛無蔽者無不愛也子曰惟
仁者能好人能惡人以其無蔽也夫然猶有惡也無
所不愛則無所惡矣故曰苟志於仁矣無惡也其于
不仁也亦哀之而已

性之必仁如水之必清火之必明然方土之未去也

論語拾遺
水必有泥方薪之未盡也火必有煙土去則水無不
清薪盡則火無不明矣人而至于不仁則物有以害
之也君子無終食之間違仁非不違仁也外物之害
既盡心一而不雜未嘗不仁也

孔氏之門人其聞道者亦寡耳顏子曾子孔門之知
道者也故孔子歎之曰朝聞道夕死可矣苟未聞道
雖多學而識之至于生死之際未有不自失也苟一
日聞道雖死可以不亂矣死而不亂而後可稱為學
矣

孔子歷試而不用慨然而歎曰道不行乘桴浮於海
從我者其由歟此非孔子之誠言蓋其一時之歎云
爾子路聞之而喜子路亦豈誠欲入海者耶亦喜孔
子之知其勇耳子曰由也好勇過我無所取材蓋曰
無所取材以爲是桴也亦戲之云爾雖聖人其與人
言亦未免有戲也

令尹子文孔子以忠許之而不與其仁陳文子孔子
以清許之而不與其仁此二人者皆春秋之賢大夫
也而孔子不以仁與之殷之三仁孤竹君之二子至

於近世惟齊管仲然後以仁許之故冉有子路之政事公西華之應對與子文之忠文子之清一也臧文仲魯之君子也其言行載於魯而孔子少之曰臧文仲不仁者三不智者三孔子曰君子而不仁者有矣夫君子而不仁則臧文仲之類歟

孔子居魯陽貨欲見而不往陽貨時其亡也而饋之豚孔子亦時其亡也而往拜之遇諸塗與孔子三言孔子答之無違孔子豈順陽貨者哉不與之較耳孟子曰當是時陽貨先豈得不見夫先之而必答禮之而必報孔子亦有不得已矣

泰伯以國授王季逃之荆蠻天下知王季文武之賢而不知泰伯之德所以成之者遠矣故曰泰伯其可謂至德也已矣三以天下讓民無得而稱焉子瞻曰泰伯斷髮文身示不可用使民無得而稱之有讓國之實而無其名故亂不作彼宋宣魯隱皆存其實而取其名者也是以宋魯皆被其禍子以爲不然人患不誠誠無爭心苟非豺狼孰不順之魯之禍始於攝而宋之禍成於好戰皆非讓之過也漢東海王疆以

論語拾遺
天下授顯宗唐宋王成器以天下讓玄宗兄弟終身
無間言焉豈亦斷髮文身子貢曰秦伯端委以治吳
仲雍繼之斷髮文身孰謂秦伯斷髮文身示不可用
者太史公以意言之耳

子曰三年學不至於穀不易得也穀善也善之成而
可用如穀苗之實而可食也盡其心力於學三年而
不見其成功者世無有也

武王曰予有亂臣十人孔子曰才難不其然乎唐虞
之際於斯爲盛有婦人焉九人而已婦人者太姒也
然則武王蓋臣其母乎古者婦人旣嫁從夫夫死從
子故春秋書魯僖公之母曰秦人來歸僖公成風之
祔太姒雖母以九人故謂之臣可也

或問子西孔子曰彼哉彼哉鄭公孫夏無足言者蓋
非所問也楚令尹子西相昭王楚以復國而孔子非
之何也昭王欲用孔子子西知孔子之賢而疑其不
利楚國使聖人之功不見於世所以深疾之也世之
不知孔子者衆矣孔子未嘗疾之疾其知我而疑我
耳

陳成子弑簡公孔子沐浴而朝云云子爲魯大夫鄰國有弑君之禍而恬不以爲言則是許之也哀公三桓之不足與有立也孔子旣知之矣知而猶告以爲雖無益於今日而君臣之義猶有倣於後世也子瞻曰哀公患三桓之偏常欲以越伐魯而去之以越伐魯豈若從孔子而伐齊旣克田氏則魯公室自張三桓將不治而自服此孔子之志也予以爲不然古之君子將有立於世必先擇其君齊桓雖中主然其所以任管仲者世無有也然後九合之功可得而成今哀公之妄非可以望桓公也使孔子誠克田氏而返將誰與保其功然則孔子之憂顧在克齊之後此則孔子之所不爲也孔子以禮樂遊於諸侯世知其篤學而已不知其他犁彌謂齊景公曰孔丘知禮而無勇若使萊人以兵劫魯侯必得志焉衛靈公之所以待孔子者始亦至矣然其所以知之者猶犁彌也久而厭之將傲之以其所不知蓋問陳焉孔子知其決不用也故明日而行使誠用之雖及軍旅之事可也

論語精義
道之大充塞天地瞻足萬物誠得其人而用之無所不至也苟非其人道雖存七尺之軀有不能充矣而况其餘乎故曰人能弘道非道弘人羣居終日言不及義此里巷之鄙夫直情而恣行者也而孔子何難焉蓋知不義之可惡而欲以小惠微譽於世世必以是取之此孔子之所難也

古之教人必以學學必教之以道道有上下其形而上者道也其形而下者器也君子上達知其道也小人下達得其器也上達者不私於我不役於物故曰

君子學道則愛人下達者知義之不可犯禮之不可過故曰小人學道則易使也

有道者不知貧富之異貧而無怨富而無驕一也然而饑寒切於身而心不動非忘身者不能故曰貧而無怨難富而無驕易

弟子孝弟忠信汎愛親仁皆其質也有其質矣而無學以文之者皆未免於有過也故曰好仁不好學其蔽也愚云云此六者皆美質也而無學以文之則其病至此故曰十室之邑必有忠信如丘者焉不如丘

論語精義
之好學也質如孔子而不知學皆六蔽之所害蓋無足怪也人生於欲不知道者未有不爲欲所蔽也故曰人之少也血氣未定戒之在色始學者未可以語道也故古之教者必始於周南召南周南召南知欲之不可已而道之以禮以禮濟欲夫是以樂而不淫始學者安焉由是以免於蔽子謂伯魚曰汝爲周南召南矣乎人而不爲周南召南其猶正牆面而立者也歟言欲之蔽也

古之傳道者必以言達者得意而忘言則言可尚也
小人以言害意因言以失道則言可畏也故曰予欲無言聖人之教人亦多術矣行止語默無非教者子貢習於聽言而未知其餘也故曰子如不言則小子何述焉子曰天何言哉四時行焉百物生焉夫豈無以感而通之乎

衛靈公以南子自汙孔子去魯從之不疑季桓子以女樂之故三日不朝孔子去之如避寇讐子瞻曰衛靈公未受命者故可季桓子已受命者故不可予以爲不然孔子之世諸侯之過如衛靈公多矣而可盡

論語精義
九
去乎齊人以女樂間孔子魯君大夫既食餌矣使孔子安而不去則坐待其禍無可爲矣非衛南子之比也

君子無所不學然而不可勝志也必有所一而後可志無所一雖博猶雜學也故曰博學而篤志將有問也必切其極退而思之必自近者始不然疑而不信也君子之道造端乎夫婦及其至也察乎天地自夫婦之所能而思之可以知聖人之所不能也故曰切問而近思君子爲此二者雖不爲仁而仁可得也故

曰仁在其中矣

疑孟

宋 司馬光

伯夷隘柳下惠不恭

疑曰孟子稱所願學者孔子然則君子之行孰先於孔子孔子歷聘七十餘國皆以道不合而去豈非非其君不事乎孺悲欲見孔子孔子辭以疾豈非非其爻不爻乎陽虎爲政於魯孔子不肯仕豈非不立於惡人之朝乎爲定哀之臣豈非不羞汗君乎爲委吏爲乘田豈非不卑小官乎舉世莫知之不怨天不尤

疑孟

人豈非遺佚而不怨乎飲水曲股樂在其中豈非阨窮而不憫乎居鄉黨恂恂似不能言豈非由由與之偕而不自失乎是故君子邦有道則見邦無道則隱事其大夫之賢者及其士之仁者非隘也和而不同遯世無悶非不恭也苟母失其中雖孔子由之何得云君子不由乎

陳仲子避兄離母

疑曰仲子以兄之祿爲不義之祿蓋謂不以其道事君而得之也以兄之室爲不義之室蓋謂不以其道取於人而成之也仲子蓋嘗諫其兄矣而兄不用也仲子之志以爲吾旣知其不義矣然且食而居之是口非之而身享之也故避之居於於陵於陵之室與粟身織屨妻辟纊而得之也非不義也豈當更問其築與種之者誰邪以所食之鷺兄所受之饋也故哇之豈以母則不食以妻則食之邪君子之責人當探其情仲子之避兄離母豈所願邪若仲子者誠非中行亦狷者有所不爲也孟子過之何其甚與

孟子將朝王

疑曰孔子聖人也定哀庸君也然定哀召孔子孔子不俟駕而行過位色勃如也足躩如也過虛位且不敢不恭况召之有不往而佗適乎孟子學孔子者也其道豈異乎夫君臣之義人之大倫也孟子之德孰與周公其齒之長孰與周公之於成王成王幼周公負之以朝諸侯及長而歸政北面稽首畏事之與事文武無異也豈得云彼有爵我有德齒可慢彼哉

孟子謂蚍蜉居其位不可以不言言而不用不可以不去已無官守無言責進退可以有餘

裕

疑曰孟子居齊齊王師之夫師者導人以善而救其惡者也豈得謂之無官守無言責乎若謂之爲貧而仕邪則後車數十乘從者數百人仰食於齊非抱關擊柝之比也詩云彼君子兮不素餐兮夫賢者所爲百世之法也余懼後之人挾其有以驕其君無所事而貪祿位者皆援孟子以自况故不得不疑

沈同問伐燕

疑曰孟子知燕之可伐而必待能行仁政者乃可伐

之齊無仁政伐燕非其任也使齊之君臣不謀於孟子孟子勿預知可也沈同既以孟子之言勸王伐燕孟子之言尚有懷而未盡者安得不告王而止之哉夫軍旅大事也民之死生國之存亡皆繫焉苟動而不得其宜則民殘而國危仁者何忍坐視其終委乎

父子之間不責善

疑曰經云當不義則子不可不諍於父傳云愛子教之以義方孟子云父子之間不責善不責善是不教不教也而可乎

性猶湍水

疑曰告子云性之無分於善不善猶水之無分於東西此告子之言失也水之無分於東西謂平地也使其地東高而西下西高而東下豈決導所能致乎性之無分於善不善謂中人也瞽叟生舜舜生商均豈陶染所能變乎孟子云人無有不善此孟子之言失也丹朱商均自幼及長日所見者堯舜也不能移其惡豈人之性無不善乎

生之謂性

疑曰孟子云白羽之白猶白雪之白白雪之白猶白
玉之白告子當應之云色則同也性則殊矣羽性輕
雪性弱玉性堅而告子亦皆然之此所以來犬牛人
之難也孟子亦可謂以辯勝人矣

齊宣王問卿

疑曰禮君不與同姓同車與異姓同車嫌其偏也爲
卿者無貴戚異姓皆人臣也人臣之義諫於君而不
聽去之可也死之可也若之何其以貴戚之故敢易
位而處也孟子之言過矣若有大過無若紂紂之卿

士莫若王子比干箕子微子之親且貴也微子去之
箕子爲之奴比干諫而死孔子曰商有三仁焉夫以
紂之過大而三子之賢猶且不敢易位也况過不及
紂而賢不及三子者乎必也使後世有貴戚之臣諫
其君而不聽遂廢而伐之曰吾用孟子之言也非篡
也義也其可乎或曰孟子之志欲以懼齊王也是又
不然齊王若聞孟子之言而懼則將愈忌惡其貴戚
聞諫而誅之貴戚聞孟子之言又將起而蹈之則孟
子之言不足以格驕君之非而適足以爲篡亂之資

也其可乎

所就三所去三

疑曰君子之仕行其道也非爲禮貌與飲食也魯伊尹去湯就桀桀豈能迎之以禮哉孔子栖栖遑遑周遊天下佛肸召欲往公山弗擾召欲往彼豈爲禮貌與飲食哉急於行道也今孟子之言曰雖未行其言也迎之有禮則就之禮貌衰則去之是爲禮貌而仕也又曰朝不食夕不食君曰吾大者不能行其道又不能從其言也使饑餓於我土地吾耻之周之亦可

受也是爲飲食而仕也必如是是不免於鬻先王之道以售其身也古之君子之仕也始不如此

堯舜性之也湯武身之也五霸假之也

疑曰所謂性之者天與之也身之者親行之也假之者外有之而內實亡也堯舜湯武之於仁義也皆性得而身行之也五霸則強焉而已夫仁義者所以治國家而服諸侯也皇帝王霸皆用之顧其所以殊者大小高下遠近多寡之間耳假者文具而實不從之謂也文具而實不從其國家且不可保况能霸乎雖

久假而不歸猶非其有也

瞽叟殺人

疑曰虞書稱舜之德曰父頑母嚚象傲克諧以孝烝烝乂不格姦所貴於舜者爲其能以孝和諧其親使之進退以善自治而不至於惡也如是則舜爲子瞽叟必不殺人矣若不能止其未然使至於殺人執於有司乃棄天下竊之以逃狂夫且猶不爲而謂舜爲之乎是特委巷之言也殆非孟子之言也且瞽叟旣執於臯陶矣舜惡得而竊之雖負而逃於海濱臯陶

猶可執也若曰臯陶外雖執之以正其恣而內實縱之以予舜是君臣相與爲僞以欺天下也惡得爲舜與臯陶哉又舜旣爲天子矣天下之民戴之如父母雖欲遵海濱而處民豈聽之哉是臯陶之執瞽叟得恣而亡舜也所亡益多矣故曰是特委巷之言殆非孟子之言也

詰墨

漢 魯人孔鮒著

墨子稱景公問晏子以孔子而不對又問三皆不
對公曰以孔子語寡人者衆矣俱以爲賢人今問
子而不對何也晏子曰嬰聞孔子之荆知白公謀
而奉之以石乞勸下亂上教臣弑君非聖賢之行
也

詰之曰楚昭王之世夫子應聘如荆不用而反周旋
乎陳宋齊衛楚昭王卒惠王立十年令尹子西乃召

王孫勝以為白公

史云二年

是時魯哀公十五年也夫子

自衛反魯居五年矣白公立一年然後乃謀作亂亂

作在哀公十六年秋也夫子已卒十旬矣墨子雖欲

謗毀聖人虛造妄言奈此年世不相值何

墨子曰孔子至齊見景公公悅之封之於尼谿晏

子曰不可夫儒浩居而自順立命而息事崇喪遂

哀盛用繁禮其道不可以治國其學不可以導家

公曰善

詰之曰即如此言晏子為非儒惡禮不欲崇喪遂哀

也察傳記晏子之所行未有以異於儒焉又景公

所以為政晏子答以禮云景公曰禮其可以治乎晏

子曰禮於政與天地並此則未有以惡於禮也晏桓

子卒晏嬰斬衰枕草苴絰帶杖菅菲食粥居於倚廬

遂哀三年此又木有以異於儒也若能以口非之而

躬行之晏子所弗為

墨子曰孔子怒景公之不封已乃樹鴟夷子皮於

田常之門

詰之曰夫樹人為信已也記曰孔子適齊惡陳常而

終不見即田常常病之亦惡孔子交相惡而又任事其
然矣記又曰陳常弑其君孔子齋戒沐浴而朝請討
之觀其終不樹子皮審矣

墨子曰孔子爲魯司寇舍公家而奉季孫

詰之曰若以季孫爲相司寇統焉奉之自法也若附
意季孫季孫旣受女樂則孔子去之季孫欲殺囚則
孔子赦之非苟順之謂也

墨子曰孔子厄於陳祭之問子路烹豚孔子不問
肉之所由來而食之剝人之衣以沽酒孔子不問

酒之所由來而飲之

詰之曰所謂厄者沽酒無處藜羹不粒之食七日若
烹豚飲酒則何言乎厄斯不然矣且子路爲人勇於
見義縱有豚酒不以義不取之可知也又何問焉

墨子曰孔子諸弟子子貢季路輔孔埋以亂衛陽
虎亂魯佛肸以中牟叛漆雕開形殘

詰之曰如此言衛之亂子貢季路爲之耶斯不待言
而了矣陽虎欲見孔子孔子不見何弟子之有佛肸
以中牟叛召孔子則有之矣爲孔子弟子未之聞也

且漆雕開形殘非行已之致何傷於德哉

墨子曰孔子相魯齊景公患之謂晏子曰鄰有聖人國之憂也今孔子相魯爲之若何晏子對曰君其勿憂彼魯君弱主也孔子聖相也不如陰重孔子欲以相齊則必強諫魯君魯君不聽將適齊君勿受則孔子困矣

詰之曰按如此辭則景公晏子畏孔子之聖也上乃云非聖賢之行上下相反若晏子恃可也否則不然矣

墨子曰孔子見景公公曰先生素不見晏子乎對曰晏子事三君而得順焉是有三心所以不見也公告晏子晏子曰三君皆欲其國安是以嬰得順也聞君子獨立不慙於影今孔子伐樹削迹不自以爲辱身窮陳蔡不自以爲約始吾望儒貴之今則疑之

詰之曰若是乎孔子晏子交相毀也小人有之君子則否孔子曰靈公汙而晏子事之以潔莊公怯而晏子事之以勇景公侈而晏子事之以儉晏子君子也

梁丘據問晏子曰事三君而不同心而俱順焉仁人固多心乎晏子曰一心可以事百君百心不可以事一君故三君之心非一也而嬰之心非三也孔子聞之曰小子記之晏子以一心事三君君子也如此則孔子譽晏子非所謂毀而不見也景公問晏子曰若人之衆則有孔子乎對曰孔子者君子行有節者也晏子又曰盈成匡父之孝子兄之弟弟也其父尚爲孔子門人門人且以爲貴則其師亦不賤矣是則晏子亦譽孔子可知也夫德之不修已之罪也不幸而

屈於人已之命也伐樹削迹絕糧七日何約乎哉若晏子以此而疑儒則晏子亦不足賢矣

墨子曰景公祭路寢聞哭聲問梁丘據對曰魯孔子之徒也其母死服喪三年哭泣甚哀公曰豈不可哉晏子曰古者聖人非不能也而不爲者知其無補於死者而深害生事故也

詰之曰墨子欲以親死不服三日哭而已於意安者卒自行之空用晏子爲引而同乎已適證其非耳且晏子服父禮則無緣非行禮者也

曹明問子魚曰

子魚
孔鮒

觀子詰墨者之辭事義相反墨

者妄矣假使墨者復起對之乎荅曰苟得其理雖百
墨吾益明白焉失其正雖一人猶不能當前也墨子
之所引者矯晏子晏子之善吾先君先君之善晏子
其事庸盡乎曹明曰可得聞諸子魚曰昔齊景公問
晏子曰吾欲善治可以霸諸侯乎對曰官未具也臣
亟以聞而君未肯然也臣聞孔子聖人然猶居處勸
惰廉隅不脩則原憲季羔侍氣鬱而疾志意不通則
仲由卜商侍德不盛行不勤則顏閔冉雍侍今君之

朝臣萬人立車千乘不善之政加於下民者衆矣未
能以聞者臣故曰官未備也此又晏子之善孔子者
也子曰晏平仲善與人交久而敬之此又孔子之貴
晏子者也曹明曰吾始謂墨子可疑今則決妄不疑
矣

翼莊

晉 郭象

晉郭象註莊子人言莊子註郭象妙處果然傳稱
本向秀所爲秀本不行象竊取之耳秀邪象邪吾
不知也然其言真足羽翼莊氏而獨行天地間爲
八十一章命之曰翼莊

質小者所資不待大則質大者所用不得小矣故程
有至分物有定極各足稱事其濟一也

遺彼忘我冥此群異異方同得我無功名是故統小

大者無小無大者也苟有乎小大則雖大鵬之與斥
鷃辛官之與御風同爲物累爾齊死生者無死無生
者也苟有乎死生則雖大椿之與蟪蛄都祖之與朝
菌均於短折爾故游於無小無大者無窮者也冥乎
不死不生者無極者也

○悲生於累累絕則悲去悲去而性命安矣○
物未嘗有謝生於自然者而必欣賴於針石故理至
則迹滅矣
足於身故閑於世也○

夫能令天下治不治天下者也治之由乎不治爲之
出於無爲也堯之治取於堯而足不必借之許由也
如必拱默山林而後謂之無爲此老莊之談所以見
棄於當塗當塗者自必於有爲之域而不返者斯由
之徒也

夫自任者對物而順物者與物無對
天地者萬物之總名也

帝堯許由各靜其所遇其地雖異其於逍遙則一也
守一家之偏向此故俗中之一物耳

至人不嬰乎禍難非避之也推理直前而自然與吉會

非非則無非。是是則無是。

夫懷豁者因天下之是非而無是非也故不由是非之塗而是非無患

無心者與物冥而未嘗有對於天下

非所明而明之對牛鼓簧耳

是非者生乎好辨而休乎天均付之兩行而息乎自

正

請問夫造物有邪無邪無也則胡能造物哉有也則不足以物無形故明夫衆形之自物而後始可與言造物

養生者非求過分也。全理盡年而已矣。

哀樂生於失得任其所受則哀樂無所措於其間不行則易欲行而不踐地不可能也無爲則易欲爲而不傷性不可得也

喜懼戰於胸中。結冰炭於五臟矣。

巧言過實偏辭失當

翼在

小人之性引之軌制則憎已。縱其亡度則亂邦。順理則異類生愛。逆節則至親交兵。知以亡涯傷性。心以欲惡蕩真。

雖所美不同而同有所美。各美其所美則萬物一美也。

聖人之在天下暖然若陽春之自和。故潤澤者不謝。淒乎若秋霜之自降。故凋落者不怨。

平粹者足以師人。

道無不在而所在皆無也。

遺生則不惡死。不惡死故所遇卽安。

係生故有死。惡死故有生。無係無惡然後能無死。無生。

自然之理有積習而成者。蓋階近以至遠。研粗以至精也。

體化合變則無往而不因。無因而不可也。

以天下爲一體者無愛爲於其間也。

知禮意者必遊外以經內。守母以存子。稱情而直往也。若乃矜乎名聲牽乎形制。則孝不以誠。慈不任實。

父子兄弟。懷情相欺。豈禮之大意哉。

聖人常游外以弘內。無心以順有。故雖終日揮形。而神氣無變。俯仰萬幾。而淡然自若。

游外者依內。離人者合俗。故有天下者無以天下爲也。

遺物而後能入群。坐忘而後能應務。

寄當於萬物則無事。而自成以一身制天下則功莫就。而任不勝也。

與物無傷者非爲仁也。而仁迹行焉。令萬物皆當非爲義也。而義功見焉。故當而無傷者非仁義之招也。然而天下奔馳棄我。殉彼以失其常。然故亂心不由於醜。而恒在美色。撓世不出於惡。而恒由仁義。悲夫。自三代以上。實有無爲之迹。無爲之迹亦有爲者之所尚也。尚之則失其兵。然之素。故雖聖人有不得已。或以槃夷之事。易垂世之性。而况悠悠者哉。

法聖人者法其迹耳。夫迹者已去之物。非應變之具也。奚足尚而執之哉。執成迹以御乎無方。無方至而迹滯矣。

翼莊 五
夫以蜘蛛蝘蝓之陋而布網轉丸不求之於工匠則
萬物各有能也

治天下惟不任知任知無妙也

無爲者非拱默之謂也直各任其自爲則性命安矣
不得已者非迫於威刑也直抱道懷朴任乎必然之
極而天下自賓也

莊老所以屢稱無者明生物者無物而物自生耳自
生耳非爲生也又何有爲於已生乎

無爲之體大矣天下何所不爲哉故主上不爲冢宰

之任則伊呂靜而司尹矣冢宰不爲百官之所執則
百官靜而御事矣百官不爲萬民之所務則萬民靜
而安其業矣萬民不易彼我之所能則天下之彼我
靜而自得矣故天子至於庶人不及昆蟲孰能有爲
而成哉是故彌無爲而彌尊

工人無爲於刻木而有爲於用斧各盡其能則天理
自然非有爲也上之無爲則用下下之無爲則自用
也

得生於失物各無失得名去矣

天下莫不相與爲彼我而彼我皆欲自爲斯東西之相反也然彼我相與爲唇齒唇齒者未嘗相爲而唇亡則齒寒故彼之自爲濟我之功弘矣斯相反而不能以相無者故因其自爲而無其功則天下之功莫不皆無矣因其不可相無而有其功則天下之功莫不可有矣若乃忘其自爲之功而思夫相爲之惠惠之愈勤而僞薄滋甚天下失業而情性瀾漫天地陰陽對生也。是非治亂互有也。將奚去哉。俗人所貴有時而賤物之所大世或小之。

知道者知其無能也無能也則何能生我我自然而生耳而四肢百體五臟精神已不爲而自成矣又何有意乎生成之後哉達斯理者必能遺過分之智遺益生之精而乘變應權故不外傷內不以物害已而常全也

心之所安則危不能危意無不適故苦不能苦不以害爲害故莫之能害

知雖落天地事雖接萬物而常不失其要極故天人之道全。

安於命者無往而非逍遙矣故雖匡陳美里無異於
紫極閑堂也

以小美大者故自失

物嗜好不同願各有極

忘歡而後樂足樂足而後身存將以爲有樂邪而至
樂無歡將以爲無樂邪而身以存而無憂

遺生然後能忘憂忘憂而後生可樂生可樂而後形
是我有富是我物貴是我榮也

世言莊子樂死惡生謬矣若然何謂齊乎所謂齊者

生時安生死時安死生死之情既齊則無爲當生而
憂死耳

守形太甚則生亡

憂來而累生者不明也患去而性得者達理也

無故而自合者天屬也合不由故則故不足以離之
也然則有故而合必有故而離矣

夫清者患於太潔清而容物與天同也

夫心以死爲死乃更速其死其死之速由哀以自喪
無哀則已有哀則心死者乃哀之大也

至美無美。至樂無樂。

內足者。神閑而意定。

彼之所美我之所惡也。我之所美彼或惡之。故通兵神竒通共臭腐耳。死生彼我豈殊哉。

誰得先物者乎哉。吾以陰陽爲先物而陰陽者卽所謂物耳。誰又先陰陽者乎。吾以自然爲先而自然卽物之自爾耳。吾以至道爲先之矣。而至道乃至無也。旣以無矣。又奚爲先。然則先物者誰乎哉。而猶有物無已。則物之自然非有使然也。

當其時則無賤。非其時則無貴。

苟進故德薄而名消。

凡所爲者不得不爲。凡所不爲者不可得爲。而愚者以爲之在已。不亦妄乎。

惠之而歡者無惠。則醜矣。

小知自私。大知任物。

性之所能不得。不爲性所不能。不得強爲。事由理發。故不覺。

神人卽聖人也。聖言其外。神言其內。

許由伯夷高尚遠退被其風者雖貪冒之人乘天衢入紫庭猶慨然中路而歎况其凡乎故夷許之徒足以當稷契而對伊呂矣夫居山谷而弘天下者雖不俱爲聖佐不猶高於蒙埃塵者乎雖難爲其風少弊故可貴也曰夷許之弊安在曰許由之弊使人飾讓以求進遂至乎之噲也伯夷之弊使暴虐之徒得肆其毒而莫之敢亢也伊呂之弊使天下貪冒之徒敢行篡逆惟聖人無迹故無弊也若以伊呂爲聖人之迹則夷齊亦聖人之迹也若夷齊非聖人之迹則伊

呂之事並非聖矣夫聖人因物之自行故無迹然則所謂聖者我本無迹故物得其迹迹得而強名聖則聖者乃無迹之名也

尚行則行矯貴士則士僞蔑行賤士以全其內然後行高而士貴

至順則用發於彼而功藏於物

0

真
莊



